



SIARAN MEDIA

MALAYSIA DAN AUSTRALIA PERKUKUH KERJASAMA STRATEGIK DALAM SEKTOR ELEMEN NADIR BUMI (REE) DAN KELESTARIAN ALAM SEKITAR

Menteri Sumber Asli dan Kelestarian Alam, YB Dato' Sri Arthur Joseph Kurup hari ini menerima kunjungan hormat daripada Pesuruhjaya Tinggi Australia ke Malaysia, Tuan Yang Terutama (TYT) Danielle Heinecke, di Bangunan Parlimen Malaysia, semalam.

Kunjungan ini bertujuan mengukuhkan hubungan bilateral serta meneroka peluang kerjasama baharu berasaskan kerangka Perkongsian Strategik Komprehensif (CSP) yang dimeterai oleh kedua-dua negara sejak tahun 2021.

Antara fokus utama perbincangan merangkumi pemerkasaan industri Elemen Nadir Bumi (*Rare Earth Elements* - REE) dan mineral kritikal. Malaysia mengiktiraf kepakaran teknikal serta kepemimpinan Australia dalam sektor ini dan komited untuk membangunkan rantai nilai REE tempatan secara komprehensif daripada peringkat pertengahan hingga hilir, selaras dengan Dasar Mineral Negara 3 (DMN3).

Perbincangan turut memberi penekanan kepada pertukaran amalan terbaik dalam pengurusan sisa pemprosesan nadir bumi, khususnya *Neutralisation Underflow Residue* (NUF), serta pembangunan keupayaan pembuatan magnet neodymium di dalam negara..

Selain sektor mineral, NRES dan pihak Australia turut membincangkan komitmen bersama dalam menangani cabaran alam sekitar, antaranya pengurusan sisa berbahaya, pemuliharaan ekosistem marin, pembiayaan iklim serta komitmen Malaysia terhadap Persidangan COP31.

Malaysia percaya bahawa gabungan kepakaran teknikal Australia dengan komitmen negara terhadap pengurusan sumber yang mampan akan menjadi pemangkin kepada pertumbuhan ekonomi hijau yang berdaya saing serta membawa manfaat jangka panjang kepada kedua-dua negara.

Turut hadir di sesi kunjungan tersebut, Ketua Setiausaha NRES, Datuk Wira Anis Rizana binti Zainudin, bersama-sama pengurusan tertinggi Kementerian serta wakil Kementerian Luar Negeri (KLN).

KEMENTERIAN SUMBER ASLI DAN KELESTARIAN ALAM (NRES)
12 OGOS 2026

